



Nivi Rosing
Inatsisartunut ilaasortaq, Inuit Ataqtigiit

**Atorfimmut atatillugu Islandimut angalaneq pillugu - § 37 naapertorlugu –
apeqqummut nr. 113/2026-mut akissuteqaat**

02-07-2026
Suliap normua 2026 - 3567
All. nr. 26627597

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasara Nivi Rosing,

Inatsisartut suleriaasianni § 37-mi, imm. 1 naapertorlugu Naalakkersuisunut
apeqquteqarputit. Apeqqutit uannut akisassanngorlugit innersuussutigineqartut
qujassutigaa. Apeqqutit ataani issuarneqarput tamatumalu kingorna akineqarlutik.

***Apeqqut 1: Ilinniartitaanermut, Kulturimut, Timersornermut Ilageeqarnermullu
Naalakkersuisup Islandimut angalanermini suut Kalaallit Nunaata angusassarinerai
pillugit sukumiisumik nassuiaateqarsinnaava?***

Akissut: Kalaallit Nunaanni ungasissumit atuartitseriaatsip nukittorsarneqarnissaanut
ilisimasani isumassarsianillu pissarsiniarneq Islandimut angalaneq pingaarnertut
siunertaqarpoq. Islandimi ilinniartitsinerit eqaatsumik ilinniarnermut neqeroorutiniq,
pitsaassutsumik qulakkeerinninnermik aamma nunami siammasissumi ilinniagaqartunik
tigumminiinnarnissamut qanoq suliaqartarnersut immikkut ittumik paasisaqarusunneq
anguniarneqarpoq.

Taakku aamma saniatigut Kalaallit Nunaat tamakkerlugu ilinniagaqarnissamut periarfissat
annertusarneqarnissaanut aqqiissutissaniq suussusersiniarnissaq siunertaavoq,
matumani digitali atorlugu ilinniartitsinerit aamma teknikkikkut periarfissaniq
pitsaanerusumik atuisinnaanerit ilanngullugit. Angalanerup aamma siunertaraa islandimi
ungasianiit atuartitsillutik ingerlatsisunik suleqateqarsinnaanerup
nukittorsarneqarsinnaaneranut periarfissaasinnaasunik qulaajaanissaq kiisalu
ilinniartitaanerup kivinnissaanut piffissamut ungasinnerusumut Naalakkersuisut
angusaqarusunnerannik tapersersuutaassaaq nunalu tamakkerlugu amerlanerusunik
piginnaasaqalersitsisunik ilinniagaqarnissamut periarfissiniissaq
qulakkeerinneqataassalluni. Atorfimmut atatillugu angalanerup tunngasut
paasisutissat annerusut pillugit, ataatsimiinnermi imaqarniliat ilanngunneqartut takukkit.

**Apeqqut 1 a. Inatsisartut upernaakkut ataatsimiinnerisa nalaanni Islandimut
sulianut atatillugu angalaneq pisariaqarsimava?**

Akissut: Inatsisartut upernaakkut ataatsimiinnerat ingerlagaluartoq, piffissami pineqartumi suliaasaqarluni angalanerup naammassinissaa pisariaqarsimasoq naliliivunga. Islandimi suliffeqarfiit attuumassuteqartut piffissami sulinngiffeqangajalerneranni ornineqarsinnaanerata eqqarsaatigalugu angalanissaq pilersaarusiorneqarpoq. Taamaattumik angalanermik kinguatitsisoqassagaluarpat suliamik ingerlatsinermi malunnaatilimmik kinguaattooratsinnaanerani kingunerisinnaavaa.

Kalaallit Nunaanni ungasianiit atuartitsinerup ineriartortinnissaanut tingussaasunik atorneqartussanik piffissamullu naleqquttunik ilisimasanik pissarsiniarnissaq angalanermi siunertarineqarpoq. Isumaqaarpunga suliami matumani siuariartornissaq qulakkiissallugu pingaaruteqartoq, matumani misilittakkanik paarlaateqatigiinnissamut periarfissat piuneranni atorluarnissaat ilanngullugit.

Apeqquut 2: Islandimut angalanermut aningaasartuutit tamarmiusut qanoq annertutigippat?

Akissut: Atorfimmi suliaasaqarluni angalanermi aningaasartuutit tamakkerlugit uannut atorfilittanullu marlunnut 82.687,95 kr.-niupput.

Apeqquut 3: Sooq ileqquusut malillugit Naalakkersuisup Islandimut angalanera pillugu Inatsisartut nalunaarfigineqanngillat?

Akissut: Atorfimmi suliaasaqarluni angalanerup pilersaarusiorneqarsimasoq, piffissap ingerlanerani aaqqissuunneqartoq, uani pineqarpoq. Angalanissaq ullormi tassani aatsaat aallarnissamut piffissaq inaarutaasumik aalajangersarneqavippoq, tassanimi suliffeqarfinnut attuumassutilinnut isumaqatigiissutit aatsaat tamarmik inissinneqarlutik iluatsimmata.

Taamaattumik ileqquusut Inatsisartunut angalanissap nalunaarutiginnissaata angumerinnissaanut periarfissaqarsimanngilaq.

Peqatigitillugu siusinnerusukkut § 37 naapertorlugu apeqquummut nr. 110, 2026-meersumut akissut innersuuppara, Naalakkersuisut angalanerit tamanut saqqummiutissallugit ileqquusumik pisussaataaffeqanngitsut, matumani nittartagaq aqqutigalugu imaluunniit Inatsisartunut nalunaaruteqarneq ilanngullugit, tamannali aallaaviatigut periarfissaqaraangat aamma piffissamut killiliussap naleqquttup iluaniikkaangat aatsaat pisarpoq.

Inussiarnersumik inuulluaqqusillunga


Nivi Olsen



10-06-2026
Sags nr. 2026 - 2136
Akt nr. 26578827

Postboks 1340
3900 Nuuk
Tlf. (+299) 34 50 00
E-mail: nap@nanoq.gl
www.naalakkersuisut.gl

Imaqarniliaq

Sumi	Bifröst University
Sammisaq	Ungasissumit atuartitseriaaseqarneq pillugu Bifröst Universitet-imik ataatsimeeqateqarneq
Peqataasut	Naalakkersuisoq Nivi Olsen Naalakkersuisoqarfimmi pisortaq Nuka Kleemann Naalakkersuisumut allatsi Kresten Lennert Kalaallit Nunaata Sinnisoqarfiani pisortaq, Karsten Peter Jensen Sungiusarluni sulisoq, Malu Hendriksen
Najuutinngitsut	
Imaqarniliortut	Karsten Peter Jensen, Malu Hendriksen

Bifröst Universitet-imut Naalakkersuisup Nivi Olsenip pulaarnera

9. juuni ilinniartitaanermut, Kultureqarnermut, Timersornermut Ilageeqarnermullu Naalakkersuisoq Nivi Olsen Bifröst Universitet-imut pulaarpoq, universitetillu pisartaanik piginnaasaqarfinnilu ilisimasalinnik ataatsimeeqateqarluni. Ungasissumit atuartitseriaaseqarneq pillugu Universitetip misilittagaanik tassungalu tunngatillugu pitsaassutsumik qulakkeerinninnermik, ilinniartut taamaatitsisannginnerannut eqaatsumillu ilinniakkanik suliaqartarneq pillugu paasisaqarnissaq pulaarnermi siunertaavoq.

Illoqarfinni annerusuni ilinniagaqarfiit avataanni innuttaasut qaffasinnerusunut ilinniakkanut assigiimmik isersinnaanerata qulakkeerreqarnissaa pillugu Islandimi Kalaallit Nunaannilu ataatsimoorussatut unammilligassaqarneq pulaarnermut aallaaviusoq. Internettikkut ilinniartitsinnermi eqaatsumik ilinniartitaanikkut periarfissaqarnerup pilersinneqarnissaanut suleqatigiinnermi misilittakkat Bifröst Universitet-ip saqqummiuppai – immikkut sammineqarluni ilinniarnermi suliffeqarnerup ilaqutaqarnerullu ilinniartunut ataqatigiissinneqarnissaat.

Ungasissumit atuartitseriaaseqarneq ilinniakkanilu ilinniartunngortarneq

Ukiuni arlaqartuni ungasissumit atuartitseriaaseqarnermik internettikkullu ilinniartitsinnermik angusaqarniarluni Bifröst Universitet-i ingerlataqarpoq. Internettikkut ilinniakkat pikkorissaanerillu arlaqartut universitetimit neqeroorutigineqarput. Qaffasinnersumik ilinniartitaanernut ilinniartunngortartut amerlinerannik atuartitseriaaseq taanna kinguneqartartoq misilittagaavoq.

Ilinniartumik amerlasuut suliffeqarnermut atassuteqarnerat imaluunniit ilaqutaqarnerat universitetip erseqqissarpaa. Ilinniagaqarnerup saniatigut ilinniartut 90 %-ii suliffeqarlutilluunniit ilaqutaqarput. Ilinniartitsinerup eqaatsumik pilersaarusiorneqartarnera universitetip ilinniartunik nutaanik kajumilersitsisarneranut pingaarnertut pissutaasartoq nalilerneqarpoq.

Atuartitsivinnit digitaliusunit Canvas-imit, Microsoft Teams-imit aamma inspera-mit ilinniartitsineq ikorfartorneqartarpoq. Universitetimi internetikkut atuartitsivinni Canvas pingaarnervuq, ilinniartullu sammisaat peqataanerallu ataavartumik ilinniartitsisut tassuuna malinnaaffigisarpaat. Soraarummeernerit ingerlanneqarnerannut Inspira atorneqartarpoq, misilitsinnerillu digitaliusut ingerlanerannut nakkutillineq tassuunakkut qulakkeerneqartarluni.

Atuartitsinerumut katersuutsitsineq tapertaasarpog, taamaalillutik ilinniartut ilaannikkut naapeqatigiissinneqartarlutik.

Ilinniartut ilinniakkaminnik taamaatitsinnginnissaat

Ilinniartut ilinniakkaminnik taamaatitsinnginnissaat Bifröst Universitet-imi aalajangersimasumik suliarineqarpoq. Ilinniartut kikkut sammisani malinnaajunnaarsimanersut Canvas atorlugu sammisanik nakkutillinnermi universitetip piaartumik paasisarpai. Sammisagarnertit unissimagaangata unammilligassat paasiniaarlugit ikorfartuinissaq neqeroorutigineqartarpoq.

Taamatut suleriaaseqarnerup ilinniakkamik taamaatittartut 11 %-imiiginnarnerannut peqqutaasoq universiteti ilisimatitsivoq, Bifröst-ili naapertorlugu universitetini allani ilinniakkaminnik taamaatitsisut 30 %-it missaanniipput.

Ilinniakkamik taamaatitsinissaq ilisimanarluaraangat ilinniartut ilinniakkaminnik taamaatitsinnginnissaannik suliaqarnermi universitetip ilaatigut ilinniakkamik annikinnerusumik ingerlatsinissaq imaluunniit ilinniartitsissutiniq ataasiakkaanik kinguartitsinissaq universitetip ilaatigut innersuussutigisarpaa. Ilinniakkamik naammassisaqarnissamik tapersersuinissaq anguniarneqartarpoq, ilinniakkamillu pilersaarusiorneq piviusorsiunngitsoq pinngitsoortinniarneqartarluni.

Ilinniakkat ilusiligaanerat ingerlanneqarnerallu

Ilinniakkat ilusiligaanerisa sulinerumut qanittunik immikkoortoqarnerat aamma eqaatsumik inaaruteqarnissamik annertuumik imaqarnerat universitetip erseqqissarpaa. Ilinniakkamik naammassinninniarluni bachelorinngorniarnermi kandidatinnngorniarnermilu soraarummeerutissiornerit qangatut aaqqissuussat annertuumik akimmisaartitsisarnerat ilinniartut ilaasa misigisarpaat. Kalaallit Nunaannut tamatuma assigiissuteqarnera oqaluuserineqarpoq, tassami ilinniartut amerlasuut bachelorinngorniarnarlutik inaarutissaminnik suliaqarnissartik specialiliorinissartillu sioqqullugu ilinniakkaminnik

taamaatitsisarmata. Eqaatsumik aamma sulinermut tunngassuteqartumik suleriaaseqarnikkut ilinniartut ilaasa ilinniakkamik naammassinninnissaat ikorfartorneqartartoq Bifröst Universitetip misilittagaraa. Ilinniartut kandidatinngorniutissaminnik taamaallaat amigaateqartut bachelorinnngorsimasunit qaffasinnerusumik universitetimi angusaqarnikuunerat universitetip aamma oqaluttuaraa.

Inuuneq naallugu ilinniagaqarnissaq aamma inersimasunut ilinniartunut aammalu inunnut suliffeqartunut immikkut ittutigit pikkorissartitsinertigit ilinniaqqittarnerit universitetip aamma suliarai.

Pitsaassutsimik qulakkeerinninneq

Universitetip suleriaasiani pitsaassutsimik qulakkeerinninneq pingaartutut ilaatinneqarpoq. Naliliisarneq aamma ilinniakkanik inerisaaneq pillugit Islandimi pitsaassutsimik qulakkeerinninnermik oqartussaasut universitetip suleqatigai.

Ilinniakkat tamarmik ukiut tallimakkaarlugit avataaneersunit naliliiffigineqartarput. Naliliinerit tamanut saqqummiunneqartarput, ilinniakkallu inerisarneqarnissaannut tunngaviliisarlutik. Kiisalu ukiut tamaasa ilinniartut peqatigalugit naliliinerit isertuunneqartussat suliarineqartarput.

Aamma universitetip pitsaassuseqarnermut ilitersuusiasq malittarpaa, taannalu ingerlaavartumik nutarterneqartarluni. Pitsaassuseqarnermik sulinermi ilaatigit ilaapput:

- Ilinniartitsineri pitsaassuseq
- Paasissutissat tunngaviusut aamma uppersaasiorneq
- Ilisimatusarnermik aallaaveqarneq
- Inuiaqatigiinnut inooqataanermullu sunniutit

Kalaallit Nunaannut naleqquttuunissaq

Inoqarfiit avinngarusimanerannik unammilligassaqarnikkut aamma ilinniagaqarnissamut assigiimmik periarfissaqarnermik anguniagaqarnermik Kalaallit Nunaata Islandillu assigiissuteqarnerat ataatsimiinnermi oqaluuserineqarpoq. Ilinniakkamik naammassinnikkumallutik nunatsinni ilaqutariit amerlasuut illoqarfimminnit imaluunniit nunaqarfimminnut illoqarfimmut angineriut nuuttartut Naalakkersuisoq Nivi Olsenip erseqqissarpaa, soorlu Nuummur.

Bifröst Universitetip misilittagaasa Kalaallit Nunaannut immikkut pingaaruteqarnerat Naalakkersuisup taamatut tunngaveqarluni nalilerpai. Ungasissumit atuartitseriaaseqarnerup nukittorsarneqarneratigit innuttaasut Nuup avataaniittut qaffasinnerusumik ilinniartitaanerni ilinniagaqalersinnaanerit annertusarneqassaaq, aamma illoqarfinni inuiaqatigiit ineriartornissaat ikorfartorneqassaaq.

Ilinniartut suaassutsinut immikkoortunut agguaanneqarnerat aamma oqaluuserineqarpoq. Maannakkut ilinniartut 70 procentii arnaasut 30 procentiilu angutaasut Bifröst Universitetip ilisimatitsissutigaa. Kalaallit Nunaanni kisitsisut sulii equnganerunerat Naalakkersuisup ilisimatitsissutigaa.

Internettikkut ilinniakkanik neqerooruteqarnissaanerup Kalaallit Nunaanni pilersinnissaa Naalakkersuisup soqutigalugu oqaatigaa. Internetti atorlugu ilinniakkanik inerisaanermik, piviusunngortitsinermik aamma ingerlatsinermik misilittakkaminnik Kalaallit Nunaanni aallartitanik avitseqateqarnissaq siunertaralugu universitetip aallartitai Naalakkersuisup tikeraarsarpai. Tikeraarnermut taamatut ittumut pilersaarutissaq Naalakkersuisoqarfiup pilersaarusiussavaa.

Ataatsimiinnerup kingorna oqallinneq

Atuartitsiffissat digitaliusut aamma eqaatsumik ilinniakkanik ingerlatsinerit, ilinniartut ilikkagaqarnerannik aaqqissuussamik malitseqartitsinerit aamma ilinniaannarnissaq siunertaralugu suliniutit ilinniakkamik naammassinninnissamut taamaatitsisullu ikilisinneqarnissaannut iluaqutaassasoq Bifröst Universitetimi pulaarnerup takutippaa.

Inoqarfiit avinngarusimaneri Nuullu avataaneersunut ilinniarfinnut isersinnaaneq annikillisinneqartarmat, tamannalu sulii unammilligassaammat, misilittakkat nunatsinni pissutsinut naleqquttuosoralugit nalilerneqarput. internettikkut ilinniartitsinermik, ilinniakkami sammisanik malittarinninnermik aamma eqaatsumik ilinniakkamik ingerlatsinermik universitetip misilittagai suleriaqqinnissaami Kalaallit Nunaanni tamarmi qaffasinnerusumik Ilinniartitaanerni ilinnialersinnaaneq nukittorsarniarlugu sulinermi pingaartutut ilaatissallugit naleqquttuosorineqarput.

Ungasissumit atuartitseriaaseqarnerup Kalaallit Nunaanni annertunerusumik piviusunngortinnera illoqarfinni ilinniartoqarfinni ilinniartut inissaqartinniarnerannut pitsaasumik aamma sunniuteqassaaq, illoqarfinnilu ilinniartoqarfinni ilinniarfiit naqinneqarnerat annikillissaaq, aamma Nuup avataani illoqarfinni ilinniarsimassuseq qaffassaaq.



10-06-2026
Suliap nr. 2026 - 2136
Akt nr. 26578827

Postboks 1340
3900 Nuuk
Oqa. (+299) 34 50 00
E-mail: nap@nanoq.gl
www.naalakkersuisut.gl

Imaqarniliaq

Sumi	Althingi
Sammisaq	Qaffasinnerusunut Ilinniakkanut Naalakkersuisoqarfimmik ataatsimeeqateqarneq
Peqataasut	Naalakkersuisoq Nivi Olsen Naalakkersuisoqarfimmi pisortaq, Nuka Kleemann Naalakkersuisumut allatsi, Kresten Lennert Kalaallit Nunaata Sinnisoqarfiani pisortaq, Karsten Peter Jensen Sungiusarluni sulisoq, Malu Hendriksen
Najuutinngitsut	
Imaqarniliortut	Karsten Peter Jensen, Malu Hendriksen

Imaqarniliaq

9. juuni Islandimi Kultureqarnermut, Nutaaliornermut Qaffasinnerusunullu Ilinniakkanut Naalakkersuisoqarfimmi Naalakkersuisoq aamma Nivi Olsen ataatsimeeqatigiipput. Naalakkersuisorli Logi Einarsson ataatsimeeqatigiinnermut peqataasinnaajunnaarpoq. Naalakkersuisoqarfimilli atorfillit peqataapput:

- Halla Jonsdóttir, naalakkersuisup tullersortaa
- Sigrun Brynja Einarisdóttir, Naalakkersuisoqarfimmi pisortaq
- Una Strand Vidarsdóttir, immikkut ilisimasalik, pisortap tullersortaa

Ilinniartitaaneq aamma internettikkut ilinniartitaaneq pillugit tullersortaasoq, Una Strand Vidarsdóttir oqaluttuarpoq. Islandimilu internettikkut ilinniartitaanerit neqeroorutigineqartartut annertusiartuinnartut oqaatigaa.

Islandip Kalaallit Nunaatalu ilinniartitaanikkut annertunerusumik suleqatigiinnissaannik pisariaqartitsisoqartoq oqaatigaa, ilinniarfiillu suleqatigiinnerunissaat kaammattuutigalugu.

Islandimi internettikkut ilinniartitsinerup piviusunngortinneqarneranut tunngatillugu inatsisitigut allannguuteqarnissaq pisariaqartinneqartoq Una Strand Vidarsdóttir-ip oqaatigaa. Ilinniartitsisunut internettikkut pikkorissaanernut peqataanerit internettikkut ilinniartitsinerit pitsaassuseqarnerannut pingaaruteqarnerpaajunerarlugit unnersiorpoq.

Ilinniartut illoqarfinnit mikinerusuneersut nunaqarfinneersullu ilinniartoqarfinni illoqarfinneersunik allaanerusunik ilinniarnerminni unammilligassaqartarnerat Naalakkersuisup oqaluttuaraa. Ilinniartut Ilisimatusarfimmi ilinniakkaminnik

taamaatitsisartut amerlanerarpai, oqaatsitigullu aporfissat imaluunniit naleqqussarnissamut tapersersorneqarnissamullu periarfissakinnera ilaatigut peqqutaasarnarparai.

Internettikkut ilinniartitsinerup ingerlanneqarneranut Islandimi ilisimasat pillugit paarlaasseqatigiittoqartarnissaa kissaatigalugu Naalakkersuisup oqaatigaa, suullu iluatsittarnersut aamma suut unammilligassaanersut tusassallugit soqutiginerarlugu. Islandimi ilinniartiit pinngortitami isumalluutit aalisarnerullu ilinniakkanut ilaatinneqartarneri Naalakkersuisup aamma isumassarsiatsialaanerarpai. Ilinniakkami kulturi inooriaaserlu ilaatinneqartillugu ilinniartut pimoorussisarnerat assersuutitut Kalaallit Nunaata Sinniisoqarfiani pisortap ilanngullugu oqaatigaa. Kalaallit kulturiannik pinngortitamilu avatangiisit ilinniakkami ilaatinneqarnerannut SILA (uumassusilerinermi bachelorinngorniarfik) assersuutissaalluarpoq. Kalaallit Nunaata Danmarkip saniatigut nunanut allanut suleqateqarnissamut ammaassinerunissaa kissaatigalugu Naalakkersuisup oqaatigaa. Illoqarfinni anginerusuni ilinniakkanut iserniarnermi Islandi assingusunik unammilligassaqartoq oqaatigaa. Kinguaariit kingulliit taakkulu ilinniagaqarnerat aqqutigalugu nunatta Islandillu attaveqatigiittarnerata attatiinnarnissaata pingaaruteqarnera illuatungeriit tamarmik oqaatigaat.

Islandip Kalaallit Nunaatalu suleqatigiinnissamik isumaqatigiissutaanni ilinniartitaanikkut suleqatigiinnissaq aamma allassimasoq Kalaallit Nunaata Sinniisoqarfiani pisortap naggataatigut oqaatigaa.



Imaqarniliaq

Sumi: University of Akureyri

Peqataasut: Naalakkersuisoq
Nivi Olsen,
naalakkersuisoqarfimmi pisortaq
Nuka Kleemann,
naalakkersuisumut allatsi
Kresten Lennert.

Imaqarniliortoq
naalakkersuisumut allatsi
Kresten Lennert

Ulloq: 22-06-2026
Suliap nr.
Akt nr. 26611293

Postboks 1029
3900 Nuuk
Oqa.: +299 34 50 00
Email: ikin@nanoq.gl
www.nanoq.gl

Ataatsimiinneq ilisarititsinermik aallarnerneqarmat University of Akureyri-mit Naalakkersuisunillu peqataasut imminnut akisussaaffimminnillu ilisarititsipput. Tamatuma kingorna universitetimi pisortat suliffimmi oqaluttuarisaanera ineriartorneralu oqaluttuaraat. Universitetip pilersinneqarnera, ineriartornera Islandillu avannaani qaffasinnerusumik ilinniartittut pingaaruteqarnera, kiisalu nunat assigiinngitsut akornannik ukkataqarnera, ilisimatusarnera aamma eqaatsumik ilinniartitaanernik periarfissaqartitsinera nassuiarneqarpoq.

Tulliatut digitalit atorlugit ilinniartitsinermik, ungasissumit atuartitseriaaseqarnermik aamma assigiinngitsunik periaaseqarluni atuartitsinermik universitetip ukiuni amerlasuuni misilittagaqarnera ilisimatitsissutigineqarpoq. Tassunga atatillugu Naalakkersuisup Nivi Olsenip apequtigaa ilinniartitsinermi ilinniartunillu allaffissornikkut aqutsinermi atorlut digitaliusut sorliit universitetimi atorneqartarnersut. Universitetimit aallartitat ilisimatitsissutigaat Canvas pingaarnertut Learning Management System-itut (LMS) atorneqartartoq. Internettimi ilinniartitsivittut Canvas atuisunut pisariitsuulluni, naatsorsuutigineqarsinnaalluni aamma eqaatsuulluni inimi atuartitsivimmiittunik ungasissumillu ilinniaaaseqarluni avataaneersunik ilinniartitsinermi ikorfartuisinnaassuseqartutut oqaatigineqarpoq. Misilittakkatik tunngavigalugit ilinniarnernut nutaaliaasunut eqaatsunullu Canvas-ip atorneqarnissaa innersuussutigineqarsinnaanerarpaat.

Ungasissumit atuartitseriaaseqarnerup Kalaallit Nunaanni nukittorsarneqarnissaa ukiuni amerlasuuni kissaatigineqarnikuusoq Naalakkersuisup Nivi Olsenip oqaatigaa. Ineriartornerli inoqarfiit avinngarusimanerujussuannik internettiknullu attaveqaatit illoqarfinni ilaqartuni nunaqarfinnilu ajornartorsiutaanerannik unammilligassaqaarnikuusoq ilisimatitsissutigaa. Kalaallit Nunaanni ilinniartitaanikkut assigimmik periarfissaqarnermut pitsaasunik digitalikkut atorulersuuteqarnissaq tunngaviussasooq Naalakkersuisup erseqqissarpaa.

Unammilligassaqaarnera universitetimi pisortat paasinerarpaat, naatsorsuutigineqarsinnaasumillu internettikku atquteqarnerup pitsaasumik digitalitigut

atuartitsinissamut pingaarnertut tunngaviunera aamma naqissuserlugu. Namminneq misilittakkatik tunngavigalugit Kalaallit Nunaanni Starlink-imik atortulersuuteqarnissaq periarfissaqarnersoq misissorneqartariaqartoq innersuussutigaat. Qangatut bredbåndip angusinnaasaanik ajornartorsiuteqarfiusuni, amerlanngitsunillu inoqarfiusuni, qaammataasanit tunngaveqarluni internettikkut attavilersuuteqarnissap aaqqiissutaasinnaanera nalilerpaat.

Aaqqiinerit digitaliusut siammasissumik amerlanngitsunillu inoqarfiusuni ilinniagaqarnissamut nukittorsaataasinnaanerat illuatungeriit naggataatigut oqallisigaat. Misilittakkamik Kalaallit Nunaanni naleqquttuusinnaaneri universitetimi aallartitat nalilerpaat, oqaatigalugulu Canvas-ip piviusunngortinneqarnissaanut siunnersuinermik, ilinniartitsinernik digitaliusunik inerisaanermik kiisalu ungasissumit atuartitseriaaseqarnermik pilersitsinermik aamma ilisimasanik avitseqatigiinnissamik Naalakkersuisunut tapersiisnaallutik universitetimi aallartitat oqaaseqarput. Ilinniartitaanermi qaninnerusumik suleqatigiinnissap inerisarnissaanut oqaloqatigiinnerit nanginneqarnissaannut illuatungeriit tamarmik soqutiginnillutik oqaaseqarput.